

Kata Kunci:
Duka
Kematian / Meninggal
Urus
Sabar



Majlis Ugama Islam Singapura

Khutbah Jumaat

28 November 2025 / 7 Jamadilakhir 1447H

Menghadapi Pemergian Orang Yang Dikasihi

الْحَمْدُ لِلَّهِ الَّذِي خَلَقَ الْإِنْسَانَ فِي أَحْسَنِ تَقْوِيمٍ، وَأَمَرَنَا بِالتَّقْوَى وَالْخُلُقِ
الْكَرِيمِ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا
مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ
أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ، وَلَا تُمُوتُنَّ إِلَّا وَأَنْتُمْ
مُسْلِمُونَ.

Zumratal mukminin rahimakumullah,

Marilah tingkatkan ketakwaan kita kepada Allah s.w.t. Laksanakan segala perintah-Nya dan jauhi segala larangan-Nya. Serulah kepada kebaikan dan cegahlah kemungkaran. Tegakkan keadilan dan tolak segala kezaliman. Amalkan sifat tawaduk dan jauhi kesombongan. Tuntutlah ilmu dan jauhi kejahilan. **Bersabarlah** dalam ujian dan bersyukurlah dalam kesenangan. Maafkanlah orang lain dan mohonlah keampunan Tuhan. Semoga Allah s.w.t. mengumpulkan kita semua di syurga-Nya yang tertinggi. Amin, ya Rabbal 'Alamin.

Sidang Jumaat yang dirahmati Allah,

Allah s.w.t. berfirman dalam Surah Al-‘Ankabut ayat 57:

كُلُّ نَفْسٍ ذَائِقَةُ الْمَوْتِ ثُمَّ إِلَيْنَا تُرْجَعُونَ ﴿٥٧﴾

*Maksudnya: “Setiap jiwa akan merasai **mati**. Kemudian kepada Kami lah kamu akan dikembalikan.”*

Mungkin ada antara kita yang pernah kehilangan insan di sekeliling, yang kembali bertemu Allah s.w.t. Inilah lumrah makhluk yang hidup, pasti akan bertemu hari penutup. Di kalangan mereka yang telah kembali, mungkin terdapat insan yang kita cintai, ahli keluarga, sahabat, tokoh yang dikagumi, para guru dan ulama, baik yang muda mahupun yang lebih berusia.

Tanpa mengira tempoh masa yang silih berganti, hakikatnya adalah, kehilangan insan yang disayangi pastinya mengundang emosi yang berat dan sukar untuk **diuruskan** seperti kepiluan, kesunyian dan **kedukaan**.

Oleh itu, **mengurus** emosi apabila berlaku **kematian** adalah amat penting. Jika tidak **diurus** dengan baik, **kedukaan** boleh menjadi satu beban yang membelenggu kehidupan, pemikiran serta tindakan, sehingga menjauhkan seorang Muslim daripada jalan kebenaran dan keredaan Allah.

Saudara-saudara yang dikasihi,

Nabi Muhammad s.a.w. sendiri pernah melalui beberapa episod **duka** dalam hidupnya, khususnya pada tahun ke-10 kenabian. Ketika ramai penduduk Makkah mengejek, menindas dan menyakiti Baginda kerana mengajak manusia kepada Islam, penjaga dan pelindungnya iaitu bapa saudaranya Abu Talib, **meninggal dunia**, sekaligus hilanglah salah satu tiang sandaran utama yang menyokong usaha dakwah Nabi s.a.w. Ini diikuti dengan **kematian** isteri Baginda yang tercinta, iaitu Sayyidatina Khadijah r.a. pada tahun yang sama.

Pemergian dua sosok utama tersebut bererti, buat pertama kalinya, Nabi s.a.w. kehilangan pelindung, penyokong dan tempat menumpang kasih. **Kedukaan** yang bertalu-talu ini menjadikan tahun tersebut dikenali dalam tradisi Sirah sebagai "*Tahun Kesedihan*".

Lalu, apakah yang dilakukan oleh Baginda Nabi Muhammad s.a.w. ketika berhadapan dengan **kedukaan** sebesar itu? Bagaimanakah Baginda **mengurus** diri setelah kehilangan dua insan yang paling dikasihi? Melalui Sirah kehidupan Nabi, terdapat **tiga panduan** yang kita perolehi daripada Baginda s.a.w. dalam menghadapi **kedukaan** disebabkan pemergian orang yang dikasihi:

Pertama: Mengingati kebaikan orang yang telah pergi

Sayyidatina Aishah r.a. meriwayatkan bahawa setiap kali Nabi s.a.w. menyebut nama Khadijah, Baginda s.a.w. pasti akan

memujinya. Sayyidatina Aishah r.a. berasa cemburu terhadap perkara ini lalu berkata, *“Engkau sering menyebutnya, sedangkan Allah telah menggantikanmu dengan seseorang yang lebih baik.”*

Baginda menjawab: *“Tidak! Allah tidak menggantikanku dengan sesiapa yang lebih baik daripadanya. Dia beriman kepadaku ketika orang lain mendustakanku. Dia menerimaku ketika manusia menolakku. Dia membantuku dengan hartanya ketika orang lain menahannya daripadaku. Dan Allah mengurniakan aku anak melalui dirinya ketika wanita lain tidak dikurniakan anak.”* (Hadis riwayat Ahmad)

Lihatlah betapa Nabi s.a.w. sentiasa menyebut kebaikan Sayyidatina Khadijah. Baginda mengenang jasa beliau dan memuji kelebihanannya setelah pemergiannya.

Demikian juga kita harus menyebutkan jasa baik mereka yang telah pergi. Ketika kita kehilangan orang tersayang, ingatlah kebaikan mereka. Kenanglah kasih sayang, bakti, dan kebaikan yang telah mereka tinggalkan, walaupun sedikit atau hanya seketika. Sesungguhnya ia sedikit sebanyak dapat menenangkan hati dan meringankan kesedihan.

Kedua: Melihat kematian dengan pandangan yang menyeluruh

Nabi Muhammad s.a.w. memahami bahawa **kematian** hanyalah satu perpindahan daripada alam yang sementara. Bagi Muslim,

inilah hakikat kehidupan. Ia tidak terbatas kepada kehidupan di atas muka bumi sahaja, namun merangkumi kehidupan yang seterusnya di akhirat yang tidak berpenghujung.

Setelah kehilangan Sayyidatina Khadijah r.a., Baginda s.a.w. mendapat ketenangan dengan keyakinan bahawa beliau berada dalam rahmat Allah dan di tempat yang lebih baik. Perpisahan itu sementara, manakala pertemuan semula menanti di syurga. Perspektif ini yang memberi kekuatan kepada Rasulullah s.a.w.

Begitulah juga, pemahaman menyeluruh terhadap **kematian** dapat membantu kita menenangkan diri apabila berkabung. Orang yang kita kasihi tidak hilang selama-lamanya, tetapi telah melangkah terlebih dahulu ke alam yang lebih kekal. Dengan izin Allah, kita akan menyusuli mereka dan bertemu semula di akhirat kelak, dalam limpahan rahmat dan kasih sayang Allah.

Ketiga: Kembali kepada Allah demi mencari kesabaran, hikmah dan kekuatan

Saudara yang dikasihi sekalian,

Dalam keadaan **duka** atau apabila berkabung, kembalilah kepada Allah s.w.t. Pintalah dan berdoalah kepadanya, kerana Allah s.w.t. yang menghadirkan **kesabaran** di kala menghadapi ujian, hikmah untuk memahaminya, dan kekuatan untuk mengharunginya. Tiada hati yang terluka yang tidak dapat diubati melalui zikrullah, berdoa kepada-Nya, dan tawakal

kepada-Nya. Dalam kita mengingat Allah, ada ketenangan; dalam kita bertawakal, ada kekuatan.

Nabi Muhammad s.a.w. bersabda bahawa Allah s.w.t. berfirman: *“Tiada balasan bagi hamba-Ku yang beriman apabila Aku mengambil insan yang paling dicintainya di dunia, lalu dia **bersabar** dan mengharap ganjaranku, melainkan syurga.”* (Riwayat Al-Bukhari)

Hadis ini mengingatkan kita bahawa **kesabaran** saat kehilangan bukan sekadar menahan emosi diri, tetapi ia juga adalah jalan yang mendekatkan kita kepada Allah dan membawa kita ke syurga-Nya. Oleh itu, marilah kita menerapkan sifat **sabar** dalam saat-saat kesedihan, dengan penuh keyakinan bahawa dengan kecekalan dan **kesabaran**, kita mendekatkan diri kepada Allah dan bakal memperoleh ganjaran-Nya yang kekal di akhirat.

Saudara yang dirahmati Allah,

Antara waktu terbaik untuk berdoa ialah ketika khatib duduk di antara dua khutbah. Maka gunakanlah kesempatan ini untuk mendoakan insan-insan tersayang yang telah kembali ke rahmatullah. Semoga Allah s.w.t. menerima doa kita yang tulus dan mengumpulkan kita bersama mereka di tempat yang mulia di akhirat kelak. Amin, ya Rabbal ‘Alamin.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، فَاسْتَغْفِرُوهُ إِنَّهُ هُوَ الْغَفُورُ
الرَّحِيمُ.

Khutbah Kedua

الْحَمْدُ لِلَّهِ حَمْدًا كَثِيرًا كَمَا أَمَرَ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى فِيمَا أَمَرَ، وَانْتَهُوا عَمَّا نَهَاكُمْ عَنْهُ وَزَجَرَ.

أَلَا صَلُّوا وَسَلِّمُوا عَلَى النَّبِيِّ الْمُصْطَفَى، فَقَدْ أَمَرَنَا اللَّهُ بِذَلِكَ حَيْثُ قَالَ فِي كِتَابِهِ الْغَزِيرِ: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.

وَارْضَ اللَّهُمَّ عَنِ الْخُلَفَاءِ الرَّاشِدِينَ الْمُهَدِّينَ سَادَاتِنَا أَبِي بَكْرٍ وَعُمَرُ وَعُثْمَانُ وَعَلِيٌّ، وَعَنْ بَقِيَّةِ الصَّحَابَةِ وَالْقُرَآةِ وَالتَّابِعِينَ، وَتَابِعِي التَّابِعِينَ، وَعَنْ مَعَهُمْ وَفِيهِمْ بِرَحْمَتِكَ يَا أَرْحَمَ الرَّاحِمِينَ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ وَالْأَمْوَاتِ. اللَّهُمَّ ادْفَعْ عَنَّا الْبَلَاءَ وَالْوَبَاءَ وَالزَّلَازِلَ وَالْمَحَنَ، مَا ظَهَرَ مِنْهَا وَمَا بَطَنَ، عَنِ بَلَدِنَا خَاصَّةً، وَسَائِرِ الْبُلْدَانِ عَامَّةً، يَا رَبَّ الْعَالَمِينَ. اللَّهُمَّ أَنْصُرْ إِخْوَانَنَا الْمُسْتَضْعِفِينَ فِي عَرَّةٍ وَفِي فَلَسْطِينَ وَفِي كُلِّ مَكَانٍ عَامَّةً، يَا أَرْحَمَ الرَّاحِمِينَ. اللَّهُمَّ بَدِّلْ خَوْفَهُمْ أَمْنًا، وَحُزْنَهُمْ فَرَحًا، وَهَمَّهُمْ فَرَجًا، يَا رَبَّ الْعَالَمِينَ. اللَّهُمَّ اكْتُبِ السَّلَامَ وَالسَّلَامَ وَالْأَمْنَ وَالْأَمَانَ

لِلْعَالَمِ كُلِّهِ وَلِلنَّاسِ أَجْمَعِينَ. رَبَّنَا آتِنَا فِي الدُّنْيَا حَسَنَةً، وَفِي الْآخِرَةِ حَسَنَةً،
وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَى، وَيَنْهَى عَنِ
الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ، فَادْكُرُوا اللَّهَ الْعَظِيمَ
يَذْكُرْكُمْ، وَاشْكُرُوا عَلَى نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ
اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.